

四庫全書

經部

欽定四庫全書

經部  
毛詩注疏卷之八

詳校官監察御史臣王爾烈

通政使司副使臣莫瞻菴覆勘

覆校官待詔臣胡士震

校對官中書臣陳林

謄錄監生臣王錦

欽定四庫全書

毛詩注疏卷二十八

漢鄭氏箋 唐陸德明音義 孔穎達疏

周頌 閔予小子之什

序閔予小子嗣王朝於廟也箋云嗣王者謂成王也

除武王之喪將始即政朝於廟也音義朝直遙疏正義

曰閔予小子詩者嗣王朝於廟之樂歌也謂成王嗣父為王朝於宗廟自言當嗣之意詩人述其事而作

此詩歌焉此朝廟早晚毛無其說毛無避居之事此朝廟事武王崩之明年周公即已攝政成王未得朝

廟且又無政可謀此欲夙夜敬慎繼續先緒必非居攝之年也王肅以此篇為周公致政成王嗣位始朝於廟之樂歌毛意或當然也此及小毖四篇俱言嗣王文勢相類則毛意俱為攝政之後成王嗣位之初有此事詩人當即歌之也鄭以為成王除武王之喪將始即政則是成王十三周公未居攝於是之時成王朝廟自言敬慎思繼先緒訪落與羣臣共謀敬之則羣臣進戒文相應和事在一時則俱是未攝之前後至太平之時詩人追述其事為此歌也小毖言懲創往時則是歸政之後元年之事以其居攝之日抗禮世子今始即政周之新王故亦與此為類稱嗣王也經云於乎皇考下篇羣臣進謀云率時昭考皆以武王為言計歲首命諸羣廟皆朝此特謀政故在武王廟也此篇王所自言亦是謀政之事但謀者與人之辭故下篇言謀此則獨述王言故稱為朝且此三篇一時之事似一人之作皆因朝廟而有此事故首

篇言朝以冠之箋正義曰以頌皆成王時事故知嗣  
王為成王曲禮云內事曰孝王某外事曰嗣王某彼  
謂祝之所言以告神因其內外而異稱此非告神之  
辭直以嗣續先王稱嗣王耳古者天子崩百官聽於  
冢宰世子以三年之內不言政事此嗣王朝廟自謀  
為政則是即政之事故知除武王喪將始即政朝於  
廟也曲禮稱天子在喪曰予小子若已除喪當為吉  
稱而經言小子在疚為喪中辭者以其服雖除去喪  
日近又序其在喪之事故仍同喪稱言將始即政者  
始欲即政先朝於廟既朝而即聽政故言將也烈文  
箋云新王即政必以朝享之禮祭於廟矣序不言祭者以  
除喪朝廟亦用朝享之禮祭於廟矣序不言祭者以  
作者主述王言其意不在於祭故略而言朝則祭可知

閔予小子遭家不造嬛嬛在疚傳閔病造為疚病也箋

云閔悼傷之言也造猶成也可悼傷乎我小子耳遭武  
王崩家道未成嬛嬛然孤特在憂病之中於乎皇考永  
世克孝念茲皇祖陟降庭止傳庭直也箋云茲此也陟  
降上下也於乎我君考武王長世能孝謂能以孝行為  
子孫法度使長見行也念此君祖文王上以直道事天  
下以直道治民信無私枉維予小子夙夜敬止於乎皇  
王繼序思不忘傳序緒也箋云夙早敬慎也我小子早  
夜慎行祖考之道言不敢懈倦也於乎君王歎文王武

王也我繼其緒思其所行不忘也音義

嬖其傾反崔本作

父音救上時掌反又如疏正義曰毛以為成王將蒞政字孝行下孟反懈音解而朝於廟乃追悼於已過欲

自彊於未然故感傷而言曰閔病乎我小子也往日遭此家道之不為言先王既崩家事無人為之使已孤特

將嬖然在於憂病之中賴周公代為家事得致太平今將自為政故追述其父於乎可歎美者我之君考謂武

王也此武王之道長可後世法之能為孝行常能念此君祖文王上事天下治民以正直之道而行止子繼父

業是能孝也皇考以念皇祖而能同其德行繼我之小子當早起夜臥敬慎而行此祖考之道止言將不敢懈

倦也於是可歎美者我文武之君以道有此德故我當繼其緒業思其所行不敢遺忘也由不敢忘故夙夜行

之鄭以為周公未攝之前成王因朝廟而感傷言曰可悼傷乎我小子耳今遭此家道之不成惟此為異餘同

傳正義曰閔病疚病皆釋詁文造為釋言文言毛意若  
在歸政之後則武王崩已多載今言小子在疚遭家不  
為追述武王初崩之時也言遭家不為謂家事無人為  
之賴周公為之已得太平將欲躬行故上念父祖追述  
此事為下言發端故王肅云病乎我小子乃遭家之不  
為言先王崩則家事莫為徒孀孀在憂而病故周公代  
為家事以致太平傳意或然箋正義曰閔者哀憫之辭  
故為悼傷之言有所造為終必成就故造猶成也人之  
所行死則事廢後主當更造立故云家道未成父在則  
有所依恃無之則已身孤特故云孀孀孤特在憂病之  
中易傳者以閔疚並訓為病於文太重孫毓云傳以閔  
為病以造訓為雖義不異於辭不便箋說為長傳正義  
曰庭直釋詁文箋正義曰茲此釋詁文又云陟升也釋  
言云降下也故以陟降為上下也武王身為孝子耳而  
云長世是其孝之法可後身長行故知謂以孝行為子  
孫法度使長見行之也文王身為王矣無人得在其上



故為上以直道事天為君所以救民故為下以直道治民即與文王所云文王陟降一也以庭止與陟降共文則二者皆用直道故分而屬之直者即不私枉之謂故云言無私枉論語云舉直措諸枉是枉者不直也禮記曰奉三無私是直者無私傳正義曰序緒釋詁文以王世相繼如絲之端緒故轉為緒箋正義曰敬者必慎故言敬慎也以上有皇考皇祖故云慎行祖考之道上文之意言皇考自念皇祖非成王念之此言繼緒思不忘宜為繼武王之緒思不忘武王耳而以為兼念文王者以成王美武王能念文王明成王亦當念之此文處末可以總前祖考故知兼念文王也

## 閔予小子一章十一句

序訪落嗣王謀於廟也箋云謀者謀政事也疏

正義曰訪

落詩者嗣王謀於廟之樂歌也謂成王既朝廟而與羣臣謀事詩人述之而為此歌焉

訪予落止率時昭考於乎悠哉朕未有艾將予就之繼  
猶判渙傳訪謀落始時是率循悠遠猶道判分渙散也  
箋云昭明艾數猶圖也成王始即政自以承聖父之業  
懼不能遵其道德故於廟中與羣臣謀我始即政之事  
羣臣曰當循是明德之考所施行故答之以謙曰於乎  
遠哉我於是未有數言遠不可及也若扶將我就其曲  
法而行之繼續其業圖我所失分散者收斂之維予小

子未堪家多難箋云多衆也我小子耳未任統理國家  
衆難成之事必有任賢待年長大之志難成之事謂諸  
政有業未平者紹庭上下陟降厥家休矣皇考以保明  
其身箋云紹繼也厥家謂羣臣也繼文王陟降庭止之  
道上下羣臣之職以次序者美矣我君考武王能以此  
道尊安其身謂定天下居天子之位音義艾五蓋反徐  
音刈判普半  
反渙音與難如字協韻乃旦反任音壬疏正義曰毛以  
下二篇注皆同長張丈反休許蚪反疏正義曰毛以  
王政恐不能繼聖父之業故於廟中與羣臣謀事汝等  
當謀我始即政之事止羣臣對王曰當循是明德之考

令效武王所施而為之王又謙而答之曰於乎可嗟嘆也此昭考之道悠然至遠哉我去之懸絕未有等數言其逮不可及不能循之汝若將我就之使我繼此先人之業則先人之道乃分散而去矣言己之才不足以繼之也維我小子才智淺短未任統理國家衆難成之事所以不能循是昭考也又述昭考之德言武王能繼其父文王以直道施於上下又能上下其家之職事謂治理羣臣使有次序也美矣我之君考武王能以此文王之道自安尊其身是昭考德同文王已不能及欲令羣臣助謀之也鄭唯繼猶判渙謂繼續其業圖我所失分散者而收斂之未堪家多難謂年幼未堪以此為異餘同傳正義曰訪謀落始率循時是悠遠猶道皆釋詁文春秋莊三年紀季以鄒入于齊左傳曰紀於是乎始判是判為分之義也渙然是散之意故為散也王肅云將予就繼先人之道業乃分散而去言已才不能繼傳意或然箋正義曰釋詁云昭光也光即明義故為明也釋

詰云艾歷也歷數也轉以相訓故艾為數猶圖釋言文此篇所述皆是王言獨知率時昭考一句為羣臣言者以王方謀於臣不得自言率考且於乎悠哉朕未有艾是報答率時昭考之言序云謀於廟明此句是臣為君謀也率時昭考猶曰儀刑文王欲令法效之也就其典法而行之謂就昭考之法也圖我所欲失分散者謂已不能行分張散失者欲令羣臣圖謀而收斂聚之以助已也易傳者以謀於羣臣當是求臣之助不宜過自謙退言已不堪繼續故易之多衆釋詁文此未堪家多難文與小毖正同但鄭以此篇在居攝之前小毖在致政之後下箋云謂使周公居攝時與此異者各準時事而為說故不同也又重解難成之事謂諸政教已有基業未得平平亦成也謂若制禮作樂營洛之等於時未成也此經雖無傳但毛以此篇為致政之後不得言年幼而未堪也當自謂才智淺短而未堪耳言未者言已得臣之助則堪之故以無助為未堪也紹繼釋詁文以大夫

稱家其家謂其羣臣之家故知謂羣臣也上言昭考此言皇考皆斥武王也武王所繼者文王耳故知繼文王陟降庭止之道上篇陟降庭止與此文相協故全引而說之上云念茲皇祖此言紹庭上下文義正同彌似一人之作上下羣臣之職以次序者謂以德詔爵以功詔祿隨才任之不失次序也言尊安其身則以保為安明為尊禮運云君者所明注云明猶尊也以此道尊安其身謂用此文王之道以定天下居天子之位是安而且尊也言此者以武王美道如是已欲謀而行之故以此事告羣臣令為已謀之也

訪落一章十二句

序敬之羣臣進戒嗣王也音義

敬之一本無之字

疏

正義曰敬之詩

者羣臣進戒嗣王之樂歌也謂成王朝廟與羣臣謀事羣臣因在廟而進戒嗣王詩人述其事而作此歌

焉

敬之敬之天維顯思命不易哉無曰高高在上陟降厥  
士日監在茲傳顯見士事也箋云顯光監視也羣臣見  
王謀即政之事故因時戒之曰敬之哉敬之哉天乃光  
明去惡與善其命吉凶不變易也無謂天高又高在上  
遠人而不畏也天上下其事謂轉運日月施其所行日  
月瞻視近在此也維予小子不聰敬止日就月將學有  
緝熙于光明佛時仔肩示我顯德行傳小子嗣王也將

行也光廣也佛大也仔肩克也箋云緝熙光明也佛輔也時是也仔肩任也羣臣戒成王以敬之敬之故承之以謙云我小子耳不聰達於敬之之意日就月行言當習之以積漸也且欲學於有光明之光明者謂賢中之賢也輔佛是任示道我以顯明之德行是時自知未能成文武之功周公始有居攝之志音義易鄭音亦王以鼓反見賢遍反逮于萬反上時掌反佛毛符弗反鄭音弼仔音茲毛云仔肩克也此二字共訓鄭亦同訓此二字云仔肩任也肩古賢反德行下孟反疏正義曰毛以為成王既謀於注同浸子鳩反道音導疏廟羣臣進而戒之曰王當敬



其事而行之敬其事而行之天之臨下乃光明顯見去惡與善其命吉凶不變易哉王無得稱曰此天乃高而又高在上以為不見人之善惡而不畏天乃升降以行其事謂轉運日月照臨四方日月視人其神近在於此不為遠也王既承其戒答之以謙曰維我小子不聰達於此敬之之意言已心不能達將欲以漸學之令日有所成就月有所可行且欲學作有光明之事於彼光明之人謂賢中之賢乃從之學又大是相克勝之道汝等羣臣當示導我以顯明之德行是王求戒之言也鄭唯佛時仔肩一句別義具在箋傳正義曰顯見釋詁文士察也獄官謂之士者言其能察理衆事是士為事之義也箋正義曰顯光監視釋詁文以此承上篇事相首尾故言羣臣見王謀即政之事故因時戒之天乃光明去惡與善謂天道去惡人與善人其事光明不暗昧也其吉凶不可變易謂善則予之吉惡則加之凶此事一定終不變易言天之可畏也天高又高在上言遠人之意

勿以天為極高謂其不見人之善惡而不畏之言天上  
下其事謂以日月行於晝夜自上至下照知其事故云  
轉運日月施其所行日月瞻視其神近在於此故須敬  
也天神察物不必以日月而知以人事所見舉驗者言  
之定本注云天謂天高又高在上傳正義曰小子嗣王  
也者上二篇亦有小子於是始解者舉下以明上釋言  
云將送也孫炎曰將行之送是將亦行之義故為行也  
以光之照耀所及廣遠故以光為廣佛之為大其義未  
聞釋詁云肩克也直以肩為克耳傳言仔肩任也則二  
字共訓為克猶權輿之為始箋亦云仔肩任也雖所訓  
不同亦二字共義箋正義曰釋詁云緝熙光也故為光  
明鄭讀佛為輔弼之弼時是釋詁文釋詁云肩勝也即  
堪任之義故為任也敬之者止謂恭敬其事而已言不  
聰達者敬雖由已隨事而生事有不知無所施敬言不  
聰達其意也日就謂學之使每日有成就月將謂至於  
一月則有可行言當習之以積漸也定本集注漸作浸

王身當理政事而言學有光明是王意以已不達於政  
未能即任其事且欲學作有光明於彼光明之人謂選  
擇賢中之賢乃從之學以賢者必有光明之德故以光  
明表賢也身方學之未堪為政故輔弼是任示導我以  
顯明之德行欲使輔弼之人示語已也王既謙虛如是  
是自知未能成文武之功周公於是之時始有居攝之  
志知者以周公若已居攝則王不得朝廟謀政明於此  
時未攝政也周公之攝必當有因王自知不堪思任輔  
弼周公之志宜因此興故於是乃有攝意也若然成王  
本欲任賢周公因之以攝所以管蔡流言復為疑惑者  
成王本欲身自為主委任賢臣及周公居攝乃代之為  
主人臣而代天子曠世之所罕聞成王既幼復為管蔡  
所惑故致疑也周公不為臣輔之必攝其政者若使為  
臣奉主每事稟承雖可以盡心而不得行意欲制禮作  
樂非攝不可故不得已而居之也中庸曰非天子不議  
禮不制度不考文又曰雖有其德苟無其位不敢作禮

樂焉周公之攝王  
政其意在於此也

敬之一章十二句

序小毖嗣王求助也箋云毖慎也天下之事當慎其

小小時而不慎後為禍大故成王求忠臣早輔助已

為政以救患難音義

毖音祕難乃旦反疏正義曰小下禍難之難皆同

王求助之樂歌也謂周公歸政之後成王初始嗣位因祭在廟而求羣臣助已詩人述其事而作此歌焉經言創艾往過戒慎將來是求助之事也毛以上三篇亦為歸政後事於訪落言謀於廟則進戒求助亦在廟中與上一時之事鄭以上三篇居攝之前此在歸政之後然而頌之大列皆由神明而興此蓋亦因

祭在廟而求助也箋正義曰愍慎釋詁文箋以經文無小字而名曰小愍故解其意此意出於允彼桃蟲  
翻飛維鳥而來也言早輔助者初嗣王位而即求之是其早也

予其懲而愍後患莫予并蜂自求辛螫傳愍慎也并蜂  
摩曳也箋云懲艾也始者管叔及其羣弟流言於國成  
王信之而疑周公至後三監叛而作亂周公以王命舉  
兵誅之歷年乃已故今周公歸政成王受之而求賢臣  
以自輔助也曰我其創艾於往時矣畏慎後復有禍難  
羣臣小人無敢我摩曳謂為譎詐誑欺不可信也汝如

是徒自求辛苦毒螫之害耳謂將有刑誅肇允彼挑蟲  
拚飛維鳥傳挑蟲鷁也鳥之始小終大者箋云肇始允  
信也始者信以彼管蔡之屬雖有流言之罪如鷁鳥之  
小不登誅之後反叛而作亂猶鷁之翻飛為大鳥也鷁  
之所為鳥題肩也或曰鷁皆惡聲之鳥未堪家多難予  
又集于蓼傳堪任予我也我又集于蓼言辛苦也箋云  
集會也未任統理我國家衆難成之事謂使周公居攝  
時也我又會於辛苦遇三監及淮夷之難也音義懲直  
升反

韓詩云苦也莽普經反爾雅作粵音同蜂本又作螽孚  
逢反螽音釋韓詩作辛赦赦事也摩尺制反本又作掣  
曳以制反艾音刈字或作忒下同創初亮反復扶又反  
謫音決誑九况反拊芳煩反鷗子消反鳥始小後大者  
也蓼疏正義曰毛以為成王即政求助於羣臣告之云  
音了疏我其懲創於往時而謂管蔡誤已以為創艾故  
慎彼在後恐更有患難汝等羣臣莫復於我掣曳牽我  
以入惡道若其如是我必刑誅於汝是汝自求辛若  
毒螫之害耳以管蔡誤已尋被誅戮故自說懲創戒使  
勿然既言將欲慎患又說當慎其小惡之初始信如彼  
桃蟲耳為惡不已於後更大似桃蟲翻然而飛維為大  
鳥矣其意言管蔡始則讒毀周公後遂舉兵謀叛逆是  
積小成大言後有此類當小即誅之勿使至大又言求  
助之意以我才智淺薄未任獨當國家多難之事恐我  
又集止於患難似蓼菜之辛若然故須汝等助我慎之  
言又者非徒多難又集辛若以此之故求人助已也鄭

於下四句文勢大同屬意小異言已所以創於往時者  
往始之時信以管蔡之讒為小如彼桃蟲耳故不即誅  
之乃叛而作亂為王室大患如桃蟲翻然而飛維為大  
鳥矣於時我年幼少未任統理國家衆難成之事故使  
周公攝政即有三監及淮夷作亂使我又會於辛苦皆  
由不慎其小以致使然我今欲慎小防患故須汝等助  
我言已求助之意也傳正義曰莽蜂摩曳釋訓文孫炎  
曰謂相掣曳入於惡也彼作粵斧古今字耳王肅云以  
言才薄莫之藩援則自得辛毒孫毓云羣臣無肯牽引  
扶助我我則自得辛螫之毒此二家以莽蜂為掣曳為  
善自求為王身自求案傳本無此意故同之鄭說箋正  
義曰懲艾也者懲與創艾皆當有事思自改悔之言此  
云予其懲而明是有事可創故鄭迹其創艾之所由管  
叔及其羣弟流言於國成王信之而疑周公金縢有其  
事也三監叛而作亂周公以王命誅之書序有其事也  
成王年十五周公自東都反而居攝稱元年其年即舉



兵東伐至二年滅殷三年伐奄叛逆之事始得平定是  
歷年乃已也既創往時畏慎後禍恐其將復如是故戒  
羣臣小子無敢掣曳我也掣曳者從旁牽挽之言是挽  
離正道使就邪僻故知謂譎詐誑欺不可信若管蔡流  
言之類也毒螫如彼毒蟲之螫故言謂將有刑誅傳正  
義曰釋鳥云桃蟲鷦鷯其雌名鷦舍人曰桃蟲名鷦其雌  
名鷦郭璞曰鷦鷯亡消反桃雀也俗名為巧婦鷦鷯小  
鳥而生鷦鷯者也陸璣疏云今鷦鷯是也微小於黃雀  
其雛化而為鷦鷯故俗語鷦鷯生鷦鷯言始小終大者始為  
桃蟲長大而為鷦鷯以喻小惡不誅成為大惡傳言始  
小終大其文得與箋同但毛以周公為武王崩之明年  
即攝政為元年時即管蔡流言成王信之周公舉兵誅  
之成王猶尚未悟既誅之後得風雷之變啓金縢之書  
始得周公箋言王意以管蔡流言為小罪恨不登時誅  
之毛不得有此意耳是其必異於鄭當謂將來之惡宜  
慎其小耳故王肅云言患難宜慎其小是謂將來患難

非悔不誅管蔡也箋正義曰肇始允信釋詁文管蔡初  
為流言成王信之既信其言自然不得誅之今悔於不  
登時誅之者此謂啓金縢後既信周公之心已知管蔡  
之妄宜即執而戮之乃迎周公當時以管蔡罪小不即  
誅殺至使叛而作亂為此大禍故所以為創也箋又言  
鷦之所為鳥題肩或曰鷦皆惡聲之鳥定本集注皆云  
或曰鷦皆惡鳥也案月令季冬云征鳥厲注云征鳥題  
肩齊人謂之擊征或曰鷦然則題肩是鷦之別名與鷦  
不類鷦自惡聲之鳥鷦非惡聲不得云皆惡聲之鳥也  
說文云鷦鷦鷦桃蟲也郭璞云桃蟲巧婦也方言說巧婦  
之名自關而東謂之桑飛或謂之工雀或謂之過羸或  
謂之女匠自關而西謂之桑飛或謂之鞭雀郭璞注云  
即鷦鷦是也諸儒皆以鷦為巧婦與題肩又不類也今  
箋以鷦與題肩及鷦三者為一其義未詳且言鷦之為  
鳥題肩事亦不知所出遺諸後賢傳正義曰釋詁云堪  
勝亦任之義也予我釋詁文毛不得有追悔管蔡之事

上經謂慎將來則知亦謂將來之事不得與鄭同也當  
言已才智淺短未任國家多難之事既已多難又會辛  
苦故王肅云非徒多難而已又多辛苦是說將來之事  
對多難為文蓼辛苦之策故云又集於蓼言辛苦也箋  
正義曰集會釋言文會謂逢遇之也世道未平戰鬪不  
息於王者為辛苦之事故言又會於辛苦也上以翻飛  
為喻謂長惡使成此云又集于蓼謂逢其叛逆故上箋  
言管蔡此箋言三監猶是一事但指意有先後耳言三  
監及淮夷之難者淮夷之叛  
亦三監使然故連言之也

### 小毖一章八句

序載芟春籍田而祈社稷也箋云籍田甸師氏所掌  
王載耒耜所耕之田天子千畝諸侯百畝籍之言借

也借民力治之故謂之籍田音義

艾所銜反除草疏也甸田見反

正義曰載芟詩者春籍田而祈社稷之樂歌也謂周公成王太平之時王者於春時親耕籍田以勸農業又祈求社稷使獲其年豐歲稔詩人述其豐熟之事而為此歌焉經陳下民樂治田業收穫弘多釀為酒醴用以祭祀是由王者耕籍田祈社稷勸之使然故序本其多穫所由言其作頌之意經則主說年豐故其言不及籍社所以經序有異也月令孟春天子躬耕帝籍仲春擇元日命民人社大司馬仲春教振旅遂以蒐田獻禽以祭社然則天子祈社亦以仲春與耕籍異月而連言之者雖則異月俱在春時故以春總之祭法云王為羣姓立社曰泰社王自為立社曰王社此二社皆應以春祀之但此為百姓祈祭文當主於泰社其稷與社共祭亦當謂泰社社稷焉箋正義曰天官甸師掌耕耨王籍月令孟春云天子親載

耒耜躬耕帝籍是籍田者甸師所掌王所耕也天子  
千畝諸侯百畝祭義文王親耕者一人獨發三推而  
已借民力使終治之故謂之籍田也月令說耕籍之  
事云天子三推公五推卿諸侯九推周語說耕籍之  
事云王耕一發班三之庶人終於千畝韋昭云王無  
耦以一耜耕班次也三之者下各三其上王一發公  
三卿九大夫二十七然則每耕人數如周語其推之  
數如月令則王一人發而三推公三人發各五推卿  
九人發各九推大夫推數則無文因以三孤并六卿  
是為九其大夫雖多見相三之數取二十七人為之  
耳其士蓋八十一人為之耳月令止有卿而韋昭兼  
言大夫明亦宜有士也庶人終於千畝謂甸師之屬  
徒也天官序云甸師下士一人府一人史二人胥三  
十人徒二百人其職云掌帥其屬而耕耨王籍注云  
其屬府史胥徒也耨芸芋也王以孟春躬耕帝籍天  
子三推三公五推卿諸侯九推庶人終於千畝庶人

謂徒三百人籍之言借也王一耕之而使庶人芸茅終之是借民者謂借此甸師之徒也王者役人自是常事而謂之借者言此田耕耨皆當王親為之但以聽政治民有所不暇故借人之力以為己功是以謂之借也漢書孝文元年開籍田應劭曰籍田千畝典籍之田臣瓚案景帝詔曰朕親耕后親桑率天下先本不得以假借為稱而鄭以為借民力者凡言典籍者謂作事設法書而記之或復追述前言號為典籍此籍田在於公地歲歲耕墾此乃當時之事何故以籍為名若以事載典籍即名籍田則天下之事無非籍矣何獨於此偏得籍名瓚見親耕之言即云不得假借豈籍田千畝者天子親耕之乎聖王制法為此籍田者萬民之業以農為本五禮之事唯祭為大以天子之貴親執耒耜所以勸農業也祭之所奉必用已力所以敬明神也祭義云天子為籍千畝躬秉耒耜以事天地山川社稷先古以為醴酪盛盛於是乎

取之敬之至也是  
說籍田之意也

載芟載柞其耕澤澤千耦其耘徂隰徂畛侯主侯伯侯  
亞侯旅侯彊侯以傳除草曰芟除木曰柞畛場也主家  
長也伯長子也亞仲叔也旅子弟也強強力也以用也  
箋云載始也隰謂新發田也畛謂舊田有徑路者強有  
餘力者周禮曰以強予任民以謂閭民今時傭賃也春  
秋之義能東西之曰以成王之時萬民樂治田業將耕  
先始芟柞其草木土氣烝達而和耕之則澤澤然解散

於是耘除其根株輩作者千耦言趨時也或往之隰或往之畛父子餘夫俱行強有餘力者相助又取傭賃務疾畢已當種也有嗷其饁思媚其婦有依其士傳嗷衆貌士子弟也箋云饁饋饌也依之言愛也婦子來饋饌其農人於田野乃逆而媚愛之言勸其事勞不自苦有略其耜俶載南畝播厥百穀實函斯活傳略利也箋云俶載當作熾菑播猶種也實種子也函含也活生也農夫既耘除草木根株乃更以利耜熾菑之而後種其種



皆成好含生氣驛驛其達有厭其傑厭厭其苗緜緜其  
庶傳達射也有厭其傑言傑苗厭然特美也庶耘也箋  
云達出地也傑先長者厭厭其苗衆齊等也載穫濟濟  
有實其積萬億及秭傳濟濟難也箋云難者穗衆難進  
也有實實成也其積之乃萬億及秭言得多也為酒為  
醴烝畀祖妣以洽百禮箋云烝進畀予洽合也進于祖  
妣謂祭先祖先妣也以洽百禮謂饗燕之屬有飮其香  
邦家之光傳飮芬香也箋云芬香之酒醴饗燕賓客則

多得其歡心於國家有榮譽有椒其馨胡考之寧傳椒  
猶餽也胡壽也考成也箋云寧安也以芬香之酒醴祭  
於祖妣則多得其福右匪且有且匪今斯今振古如茲  
傳且此也振自也箋云匪非也振亦古也饗燕祭祀心  
非云且而有且謂將有嘉慶禎祥先來見也心非云今  
而有此今謂嘉慶之事不聞而至也言修德行禮莫不  
獲報乃古古而如此所由來者久非適今時音義非側  
伯反  
除木也澤澤音釋釋注同爾雅作郝音同云耕也郭云  
言土解也耦五口反芸音云本又作耘除草也吟之忍

反徐又音眞強其良反有餘力易本又作場音亦長張  
丈反下同徑古定反間音閑傭音容賃女鵠反烝音證  
解音蟹噴勑惑反饁于輒反饋其愧反饌式亮反略如  
字字書作絜同俶載毛並如字鄭作熾蓄下篇同函戶  
南反下篇同熾尺志反盛也舊側其反種章勇反下其  
種同株音誅驛音亦爾雅作繹繹云生也厭於艷反下  
同緜緜如字爾雅云鹿也韓詩作鉏田也字林云穠耕禾  
反芸也說文作穠音同云穠耨鉏田也字林云穠耕禾  
間也方遙反射食亦反長張丈反穫戶郭反積子賜反  
又如字注同穠音妙烝之丞反畀必二反注同飮蒲即  
反芬芳也說文云食之香也字又作苾音同一音蒲必  
反注同椒子消反徐子料反沈作倅尺叔反云作椒者  
誤也此論釀酒芬芳無取椒氣之芳也案唐風椒聊箋  
云椒之性芬芳玉注云椒芬芳之物此傳云椒猶飮飮  
芬香椒是芬芳之物此正相協無故改字為倅倅始也  
非芬香馨呼庭反且七也反又子餘反下同見賢遍反

疏正義曰毛以為周公成王之時耕籍以勸下民祈社而求穀實故其時之民樂治田業於是始芟其所田之草始除其所田之木待其土氣烝達然後耕之其耕則釋釋然土皆解散又二人相對者有千耦之人其皆耘除此所芟柞草木之根株也其耘之時或往之隰或往之吟其所往之人維為主之家長維處伯之長子維次長之仲叔維衆之子弟維強力之兼士維所以傭賃之人此等皆往吟隰芸除草木盡家之衆皆服作勞有喻然而衆其來饒饋之人即其婦之與士也此農人不以其身為苦乃謂饒已為勞思逆而媚其行饒之婦有愛其從來子弟是王化之深務農之至也此農人既去草木根株有略然而利者其所用之耜以此利耜始耕於南畝之中以種其百衆之穀此穀之種實皆含此當生之活氣故從土中驛驛然其鑽土以射出其土也乃有厭然而特茂者其傑立之苗也厭厭然而長大者其齊等之苗也於是農人則緜緜然用其力應芸之以此

至於大熟則獲刈之濟濟然穗衆而難進有成實而多者其此民之積聚也乃有萬與億而及秭言其多無數也天下豐熟而此在上稅而取之以為三種之酒以為五齊之醴進予先祖妣又以會聚其百衆之禮而為祭祀此所為之酒醴有飫然其氣芬香用之以祭祀為鬼神所饗為我國家之光榮也此所為之酒醴有如椒之馨香用之以祭祀為鬼神降福則得年壽與成德之安寧也既治田得穀用之祭祀而使鬼神歡悅邦國安寧祭祀得所故能誠感天地心非云今而有此謂禎祥之應事未至而先來也心非云今而有此謂嘉慶之事不先聞而即至也此事乃自古以來當如此言修德行禮莫不獲報非獨於此周時鄭以俶載為熾菑熾然入地而菑殺其草於南畝之中又以烝畀祖妣為祭祀之禮以祀宗廟以洽百禮為饗燕之禮以待賓客既言二禮又反而申之言此所為之酒醴有飫然其氣芬香用之以饗燕賓客為賓所悅為我國家光榮也又其為酒

醴有如椒之香馨用之以祭祀鬼神為鬼神降福則得  
年壽與成德之安寧也又以且為辭以振為古餘同傳  
正義曰隱六年左傳云如農夫之務去草馬芟夷蘊崇  
之是除草曰芟也秋官柞氏掌攻草木及林麓是除木  
曰柞地官遂人云十夫有溝溝上有畛則畛為地畔之  
徑路也至此而易之主故以畛為場信南山云疆場翼  
翼是也坊記云家無二主主是一家之尊故知主家長  
也主既家長而別有伯則伯是主之長子也亞訓次也  
次於伯故知仲叔也不言季者以季幼少宜與諸子為  
類也令旅中兼之旅訓衆也訓幼者之衆即季弟及伯  
仲叔之諸子故云旅子弟也此子弟謂成人堪耕耘者  
若幼則從饗而行下云有依其士是也強有力能兼人  
故云強強力也以此者傭賃之人以意驅用故云用也箋  
正義曰載始也者此本其開地之初故載為始原隰者  
地形高下之別名隰指地形而言則是未嘗墾發故知  
謂新發田也畛是地畔道路之名故知謂舊田有徑路

者強有餘力謂其人強壯治一夫之田仍有餘力能佐  
助他事者也周禮曰以強予任民地官遂人文彼注云  
強予謂民有餘力復予之田引之以證強有餘力彼民  
作吐注云變民言吐異外內也然則吐民是一故以民  
言之以謂閒民今時傭賃者太宰以九職任萬民其九  
曰閒民無常職轉移執事鄭司農云閒民謂無事業者  
轉移為人執事若今時傭力也是有閒民傭賃之事也  
又解云以之意春秋之義能東西之曰以此傭力隨主  
人所東西故稱以也僖二十六年左傳曰凡師能左右  
之曰以左右即東西也彼雖為師發例要以者任其東  
西故引之以證此太平之世而得閒民者人之才度  
等級不同自有不能存立於為人所役者聖人順而任  
之周禮列於九職是雖太平之世必為人傭故此得有  
之也土氣烝達者周語說將耕之事云陽氣俱烝土膏  
其動韋昭云烝升也月令孟春天氣下降地氣上騰注  
云此陽氣烝達可耕之候然則土氣烝達者謂陽氣升

上達出於是耕之故土得釋釋然而散也釋訓云釋釋耕也舍人曰釋釋猶藿藿解散之意言輩作者合家盡行輩輩俱作言趨時也千耦謂為耦者千是二千人為千耦與十千維耦異也或往之隰或往之吟言其所往皆徧也故王肅云有隰則有原言吟新可見美其陰陽和得同時就功也及解所以合家俱作之意務疾畢已當種也已猶了欲疾耕使畢了故下經而種之傳正義曰噴衆貌者以耘者千耦饒者必多故知噴為衆貌士者男子之耦而不在耕芸之中宜其幼者行饒故為子弟此經言有噴其饒以目之婦士俱是行饒之人七月云同我婦子即此之士也箋正義曰饒饒釋詁文孫炎曰饒野之饒也依文與媚相類媚為愛故知依亦愛也傳正義曰略利釋詁文箋正義曰實種子也者此說初種故知實為種子函者容藏之義故轉為含猶人口含之也活者生活故為生言種子內含生氣種之必生也傳正義曰達射也者苗生達也則射而出故以達為



射釋訓云驛驛生也舍人曰穀皆生之貌是驛驛其達  
謂苗生達也厭厭者苗長茂盛之貌其傑苗之傑者亦  
是苗也而與其苗異文傑謂其中特美者苗謂其餘齊  
等者二者皆美茂故俱稱厭但以齊等苗多重言厭厭  
耳以二者相涉故傳詳其文故云有厭其傑言苗傑然  
特美也箋申特美之意故云先長者傑既是先長明厭  
厭其餘衆苗齊等者庶是芸之別名縣縣言詳密也郭璞曰芸不怠  
訓云縣縣庶也孫炎曰縣縣言詳密也郭璞曰芸不怠  
也王肅云芸者其衆縣縣然不絕也釋訓云濟濟容止  
也在田獲刈不得有濟濟之容但容止濟濟者必舉動  
安舒此刈者以禾稠難進不能速疾故亦以濟濟言之  
言難者箋申之云穗衆難進也箋正義曰烝進畀予洽  
合皆釋詁文箋以下云有飴有椒重設其文則是二事  
故分此以當之以洽百禮為合聚衆禮其用酒醴者祭  
祀以外唯饗燕耳故言謂饗燕之屬賓之初筵與豐年  
皆有以洽百禮之文與此同而賓之初筵其文之下即

云有壬有林林謂諸侯之君故箋以為合見百國所獻之禮豐年止言報祭無饗燕之義故箋不為說則與烝畀祖妣共為祭祀之禮此以有二事故以為饗燕之禮皆觀文為義故三者皆異毛既無饗燕之言明皆據祭祀與鄭不同傳正義曰苾芬香也者飴者香之氣故為芬香也箋正義曰芬香之酒醴者箋以此充饗燕下充祭祀者以言邦家之光謂國有光榮是於賓客之辭也胡考之寧言身得壽考與祭之祝慶萬壽無疆義同是於鬼神之辭也及知此為饗燕下為祭祀以饗燕施於賓客故云得其歡心於國家有榮譽祭祀進於祖妣故云多得福祿於身得壽考傳正義曰椒猶飴也者椒是木名非香氣也但椒木之氣香作者以椒言香故傳辨之云猶如飴也傳二十三年左傳曰雖及胡耆周書諡法保民耆艾曰胡胡為壽也考成釋詁文言考者明老而有成德蕩曰雖無老成人是也且此振自者毛雖有此訓其義與鄭不殊箋正義曰振亦古也者箋以爾雅

有此正訓故易傳以為振亦古也以上陳祭饗二事此承上文故云饗燕祭祀直言饗燕祭祀謂為之得其所也有天下者主於敬待神人接之以禮則人神慶悅至誠感物祥瑞必臻故知非且有且非今斯今謂嘉慶禎祥之事非謂其有而已有之以言報應之疾也且實語助但今謂今時則且亦今時其實是一作者美其事而丁寧重言之耳嘉慶謂王者所得美善之實事禎祥謂嘉慶之前先見為徵應者也以其分為二文故屬禎祥於上句屬嘉慶於下句但禎祥為嘉慶而先見故言將有嘉慶禎祥先來見也以禎祥是事之先應故言先來見嘉慶是善之實事故云不間而至二者意亦同也此禎祥嘉慶自天為之享燕之禮得所不謂其至而已至言修德行禮莫不獲報乃古又古以來當皆如此非適今時美此太平之主能重於農業獲此福慶故歌之也

# 載芟一章三十一句

序良耜秋報社稷也音義

耜音似田器也

疏

正義曰良耜詩者秋報社稷之

樂歌也謂周公成王太平之時年穀豐稔以為由社稷之所祐故於秋物既成王者乃祭社稷之神以報生長之功詩人述其事而作此歌焉經之所陳其末四句是報祭社稷之事婦子寧止以上言其耕種多獲以明報祭所由亦是報之事也經言百室盈止婦子寧止乃是場功畢入當十月之後而得言秋報者作者先陳人事使畢然後言其報祭其實報祭在秋寧止在冬也本或秋下有冬衍字與豐年之序相涉而誤定本無冬字

畋畋良耜俶載南畝播厥百穀實函斯活傳畋畋猶測測也箋云良善也農人測測以利善之耜熾舊是南畝

也種此百穀其種皆成好含生氣言得其時或來瞻女  
載筐及筥其饌伊黍其笠伊糾其鑄斯趙以薺荼蓼傳  
笠所以禦暑雨也趙刺也蓼水草也箋云瞻視也有來  
視女謂婦子來饁者也筐筥所以盛黍也豐年之時雖  
賤者猶食黍饁者見載糾然之笠以田器刺地薺去荼  
蓼之事言閔其勤苦荼蓼朽止黍稷茂止穫之捃捃積  
之粟粟其崇如墉其比如櫛以開百室傳捃捃穫聲也  
粟粟衆多也墉城也箋云百室一族也草穢既除而禾

稼茂禾稼茂而穀成熟穀成熟而積聚多如壩也如櫛也  
也以言積之高大且相比迫也其已治之則百家開戶  
納之千耦其耘輩作尚衆也一族同時納穀親親也百  
室者出必共洫間而耕入必共族中而居又有祭酺合  
醪之歡百室盈止婦子寧止殺時犉牡有捄其角以似  
以續續古之人傳黃牛黑脣曰犉社稷之牛角尺以似  
以續嗣前歲續往事也箋云捄角貌五穀畢入婦子則  
安無行饁之事於是殺牲報祭社稷嗣前歲者復求有

豐年也續往事者復以養人也續古之人求有良司穡

也音義

章勇反楚側反爾雅云畎畎也郭云猶嚴利也種

糾居黝反

又其皎反鐫音博趙徒了反刺也又如字沈

作蓀引此

以蓀茶蓼茶蓼上音徒下音了刺七亦反下

同盛音成

去起呂反朽虛有反爛也挫珍栗反積子賜

反比毗志反

注同櫛側瑟反酺音蒲又音步醪其據反

又其畧反

合錢飲酒也惇如紕反本亦作擗揀音蚪復

扶又反

疏正義曰毛以為農人以畎畎然利刀善耜始

下同

事於南畝而耕之種其百衆之穀其實皆含

此當時生之氣故生而漸長農人事而芸之於是有來

視汝之農人者

載其方筐及其圓筥其筐筥所盛以釀

者維是黍也

既釀到田見其農夫所載之笠維糾然其

田器之鑄以此

趙而刺地以薺去茶蓼之草其茶蓼之

草既朽敗止黍稷乃茂盛止及其成熟乃獲刈之捭捭然為聲既獲訖乃積聚之粟然衆多所積聚者其大如城雉之峻壯其比迫如櫛齒之相次既蹂踐而治之則以開百室一時而納之於是百室皆盈滿而多穀粟止婦子皆不行而安寧止天下大熟民安如此國家乃殺是犝牡之牲有揀然者此牲之角用此牲以報祭社稷所以報祭之者以嗣繼其先歲復求其豐年以續接其往歲復得以養人又求良善司嗇以續古昔之人庶其常勤勸農常得豐年也鄭唯倣載為熾蓄為異餘同傳正義曰畋畋猶測測者以畋畋文連良耜則是刃利之狀故猶測測以為利之意也釋訓云畋畋耜也舍人曰畋畋耜入地之貌郭璞曰言嚴利也笠所以禦暑雨也者笠之為器暑雨皆得禦之故兼言也其鑄斯趙則趙是用鑄之事鑄是鋤類故趙言刺地也又釋草云蒿虞蓼某氏曰蒿一名虞蓼孫炎曰虞蓼是澤之所生故為水草也蓼是穢草茶亦穢草非苦菜也釋草云茶委



葉舍人曰茶一名委葉某氏引此詩則此茶謂委葉也  
王肅云茶陸穢蓼水草然則所由田有原有隰故並舉  
水陸穢草箋正義曰瞻視釋詁文下言婦子寧止明此  
以為不寧故知有來視汝謂婦子來饁者也筐筥之下  
即云饗黍故知筐筥所以盛黍也少牢特牲大夫士之  
祭禮食有黍明黍是貴也玉藻云子卯稷食菜羹為忌  
日貶而用稷是為賤也賤者當食稷耳故云豐年之時  
雖賤者猶食黍瞻汝是見彼農人之時而陳其筥其罇  
故知見農人戴糾然之笠以田器刺地藉去茶蓼之草  
定本集注皆云藉去茶蓼之事言閔其勤苦與俗本不  
同傳正義曰釋訓云捫捫獲也栗栗衆也李巡曰栗栗  
積聚之衆孫炎曰捫捫獲聲也皆取此為說也城之與  
墻俱得為墉但此比高大故為城箋正義曰百室一族  
也者周禮五家為比五比為閭四閭為族是百室為一  
族於六鄉則一族於六遂則一鄣是鄭以鄉尊於遂故  
舉鄉言耳上篇言千耦此篇言百室雖未必一人作而

其文千百不同故解其意千耦其耘輩作者尚衆故舉  
多言也一族同時納穀見聚居者相親故舉室言也又  
解族黨州鄉皆為聚屬獨以百室於親親之意由百室  
出必共洫間而耕入必共族中而居又有同祭酺合醵  
之歡也故徧言之也遂人云百夫有洫故知百室共洫  
間而耕彼注云百夫一鄩之田為六遂之法族在六鄉  
而引彼者小司徒注云鄉之田制與遂同故得舉鄩之  
制以言族也祭酺者族師職云春秋祭酺注云酺者為  
校人物災害之神也古書酺為步杜子春云當為酺玄謂  
人鬼之步與蓋亦為壇位如雩祭云族無飲酒之禮因  
祭酺而與其民以長幼相醕酢馬鄭於彼雖以酺步為  
疑而以酺為正故此以酺言之螻螟食穀之蟲害及人  
物此神能為災害故祭以止之因此祭酺聚錢飲酒故  
後世聽民聚飲皆謂之酺漢書每有嘉慶令民大酺五  
日是其事也彼注云因祭酺而與其民長幼相醕即此

合醪也。禮器云：曾子曰：周禮其猶醪與？注云：合錢飲酒為醪。王居明堂之屬，乃命國家醪是也。族師雖云祭酺，不言即為醪。飲酒禮記自有醪語，不云醪是族法。鄭知祭酺必有飲酒合醪是族法者，以族師上文云：月吉則屬民而讀邦法書，其孝悌睦姻有學者，即云春秋祭酺亦如之，是於祭酺亦屬民讀法。因祭而聚族，民明其必為行禮，不可徒然。又以族無飲酒之禮，故知因祭酺必合錢飲酒，與其民長幼相醕酢也。鄉飲酒之禮，州長於春秋有屬民飲酒於序，以正齒位之禮。此皆禮有飲酒當以公物供之，無為須合錢也。唯族無飲酒之禮，明合錢飲酒是族師之法。故箋以為同族之禮，傳正義曰：黃牛黑脣曰牝者，釋畜直云黑脣牝，以言黑脣明不與身同色。牛之黃者，衆故知黃牛也。某氏亦云：黃牛黑脣曰牝，取此傳為說也。地官牧人云：凡陰祀用黝牛，毛之注云：陰祀祭地北郊及社稷也。然則社稷用黝牛角以黑而用

欽定四庫全書

卷二十八

黃者蓋正禮用黝至於報功以社是土神故用黃色仍用黑脣也以經言角辨角之長短故云社稷之牛角尺也王制云祭天地之牛角繭栗宗廟之牛角握賓客之牛角尺無社稷之文卑於宗廟宜與賓客用尺也禮緯稽命徵云宗廟社稷角握此箋不易毛傳蓋以禮緯難信不據以為正也社稷太牢獨云牛者牛三牲為大故特言之以似以續似則為嗣嗣續俱是繼前之言故為嗣前歲續往歲之事前往一也皆求明年使續今年據明年而言故謂今年為前往也箋正義曰捋角貌者此有捋其角與兕觥其觥角弓其觥觥皆與角共文故為角貌以上言其饌是婦子所為也言寧止遙結上句故知安無行饌之事序云秋報社稷故云於是殺牲以報祭社稷也此為年豐報祭而云更求嗣續故知嗣前歲者復求有豐年也嗣往事者復求以養人也言今歲已有豐年得穀養人求今後歲復然也嗣續一義也豐年養人亦一事故因其異文而分屬之耳甫田云以介我

稷黍是求有年也以穀我士女是求養人也續古之人  
文連牝牡之末則亦祭求之非人無以續人明求將來  
之人使續往古之人農事須人唯司嗇耳故知求有良  
司嗇謂求善田畯也言得善官教民可以益使年豐故  
也司嗇已有選擇而祭神求之者得  
賢以否亦是神明所助故因祭求之

### 良耜一章二十三句

序絲衣繹賓尸也高子曰靈星之尸也箋云繹又祭

也天子諸侯也繹以祭之明日卿大夫曰賓尸與祭

同日周曰繹商謂之彤音義

絲衣繹祭之服繹音亦祭之明日又祭也字書

作釋融餘戎反疏正義曰絲衣詩者繹賓尸之樂歌  
尚書作彤音同也謂周公成王太平之時祭宗廟

之明日又設祭事以尋繹昨日之祭謂之為繹以賓  
事所祭之尸得之得禮詩人述其事而為此歌焉經  
之所陳皆繹祭始末之事也子夏作序則唯此一句  
而已後世有高子者別論他事云靈星之尸言祭靈  
星之時以人為尸後人以高子之言以證靈星尚有尸宗廟  
之祭有尸必矣故引高子之言以證賓尸之事子夏  
說受聖旨不須引人為證毛公分序篇端於時已有  
此語必是子夏之後毛公之前有人著之史傳無文  
不知誰著之故鄭志答張逸云高子之言非毛公後  
人著之止言非毛公後人亦不知前人為誰也以鄭  
言非毛公後人著之不云詩序本有此文則知鄭意  
不以此為子夏之言也鄭知非毛公後人著之者鄭  
玄去毛公未為久遠此書有所傳授故知毛時有之  
若是後人著之則鄭宜除去答之以此明已不去之  
意以毛公之時已有此言故也高子者不知何人孟  
軻弟子有公孫丑者稱高子之言以問孟子則高子

與孟子同時趙岐以為齊人此言高子蓋彼是也靈  
星者不知何星漢書郊祀志云高祖詔御史其令天  
下立靈星祠張晏曰龍星左角曰天田則農祥也晨  
見而祭之史傳之說靈星唯有此耳未知高子所言  
是此以否箋正義曰繹又祭釋天文李巡曰繹明日  
復祭曰又祭知天子諸侯同名曰繹以祭之明日者  
宣八年六月辛巳有事于太廟仲遂于垂壬午猶繹  
有事謂祭事也以辛巳日祭壬午而繹是皆為諸侯  
用祭之明日此則天子之禮同名曰繹故知天子亦  
以祭之明日也故公羊傳曰繹者何祭之明日也知  
卿大夫曰賓尸者今少牢饋食禮者卿大夫之祭禮  
也其下篇有司徹云若不賓尸注云不賓尸謂下大  
夫也以言若不賓尸是對有賓尸者有司徹所行即  
賓尸之禮是即大夫曰賓尸案其禮非異日之事故  
知與祭同日然則天子諸侯謂之繹卿大夫謂之賓  
尸是繹與賓尸事不同矣而此序云繹賓尸者繹祭

之禮主為賓事此尸但天子諸侯禮大異日為之別為立名謂之為繹言其尋繹昨日卿大夫禮小同日為之不別立名直指其事謂之賓尸耳此序言繹者繹商謂之彤者因繹又祭遂引釋天以明異代之禮別也彼云周曰繹商曰彤孫炎曰彤者亦相尋不絕之意尚書有高宗彤日是其事也

絲衣其紆載弁俵俵自堂徂基自羊徂牛鼐鼎及鼐俵  
絲衣祭服也紆絜鮮貌俵俵恭順貌基門塾之基自羊  
徂牛言先小後大也大鼎謂之鼐小鼎謂之鼐箋云載  
猶戴也弁爵弁也爵弁而祭於王士服也繹禮輕使士



升門堂視壺濯及籩豆之屬降往於基告濯具又視牲  
從羊之牛反告充已乃舉鼎冪告絜禮之次也鼎圜弇  
上謂之鼐兕觥其觥旨酒思柔不吳不敖胡考之休傳  
吳譁也考成也箋云柔安也繹之旅士用兕觥變於祭  
也飲美酒者皆思自安不謹譁不敖慢也此得壽考之

休徵音義

紉乎浮反徐孚不反又音培又音弗載如字又音戴同弁皮變反俛音求恭慎也說文作

練同鼎乃代反郭音乃鼐音茲徐音災郭音才說文作  
鎡字音茲塾音孰門側堂也或音育冪亡歷反本亦作  
鼎圜音圓弇古奄字光字又作兕徐履反又觥古橫反  
罰爵也字又作觥同斛音蚪本又作觥吳舊如字說文

作吳吳大言也何承天云吳字誤當作吳從口下大故  
魚之大口者名吳胡化反此音恐驚俗也音話教五誥  
反本又作傲注同譁音花謹疏正義曰此述繹祭之事  
火官反又火元反慢亡諫反疏上五句言祭之初下四  
句言祭之末初言卑者恭順則當祭尊者可知祭末舉  
其不慢則當祭敬明矣是舉終始以見中舉輕以明重  
上言於祭之前使士之行禮在身所服以絲為衣其色  
紵然而鮮絜在首載其爵色之麻弁其貌俛俛而恭順  
此絲衣載弁之人從門堂之上既視壺濯及籩豆降往  
於門塾之基告君以濯具更視三牲從羊而往牛所以  
告肥充又發舉其鼐鼎及鼐鼎之覆罍而告此鼎之絜  
夫祭之初惟卑者行事尚能恭順故至於當祭事尸禮  
無失者以此至於祭未旅醕之節兕觥罰爵其醵然徒  
設無所用之所以然者由此助祭飲美酒者皆思自反  
不謹譁不傲慢每事如禮故無所罰恭順如此當於神  
明是得壽考之休徵言祭而得禮必將得福故美而歌

之傳正義曰絲衣祭服也者此述祭事故知絲為之故云絲衣祭服傳雖不解弁亦當以為爵弁爵弁之服玄衣纁裳皆以絲為之故云絲衣也絲衣與紕共文故為紕鮮貌也載弁謂人戴弁也戴弁者俅俅則俅俅人貌故為恭順貌也基門塾之基者釋宮云門側之堂謂之塾孫炎曰夾門堂也冬官匠人云門堂三之二注云以明臣下當見於君必孰思其事是塾為門之堂也因取其名自堂祖基何知非廟堂之基者以繹禮在門不在廟故知非廟堂也郊特牲曰繹之於庫門內祔之於東方失之矣繹於門內為失明其當在門外祔以東方為失明其當在西方是祔之與繹一時之事故注云祔之禮宜於廟門外之西室繹又於其堂神位在西二者同時而大名曰繹又禮器曰為祔乎外注云祔祭明日之繹祭也謂之祔者於廟門外之旁因名焉其祭之禮既設祭於室而事尸於堂孝子求神非一處也以此二注言之

則祊繹大同而繹統名焉繹必在門故知基是門塾之  
基謂廟門外西夾之堂基也自羊徂牛是從此往彼為  
先後之次故知詩意言先小後大為行事之漸也釋器  
云鼎絕大者謂之鼎鼎既絕大鼎自然小故曰小鼎謂  
之鼎此經自堂徂基但言所往之處不言所為之事牛  
羊但言所視之物不言所往之處互相足也鼎及鼐不  
言自徂蒙上自徂之文鼎則先大後小與牛羊異者取  
鼐為韻故變其文也箋正義曰載猶戴也者載者在上  
之名故經稱載弁若言以頭戴之則於人易曉故云載  
猶戴也禮有冠弁韋弁皮弁皆不以絲為衣且非祭祀  
之服雜記云士弁而祭於公冠而祭於已士冠禮有爵  
弁服練衣與此絲衣相當故知此弁是爵弁士服之以  
助君祭也又解天子之朝羣官多矣所以不使服冕之  
人而使戴弁之意由繹之禮輕故使士也若正祭則小  
宗伯云視滌濯祭之日逆齊省鑊告時於王告備於王  
彼正祭重使小宗伯此繹祭輕故使士蓋亦宗伯之屬

士也知使士升門堂視壺濯及籩豆者以特牲雖則士禮而士卑不嫌其禮得同君故準特牲為說特牲先夕陳事主人即位於堂下宗人升自西階視壺濯及籩豆反降東北面告濯具主人出復外位宗人視牲告充宗人舉鼎冪告絜彼先視濯籩豆次視牲次舉鼎先後與此羊牛鼎次第正同自堂徂基文在牛羊之上自然是視壺濯籩豆矣以此知自堂徂基是告濯具從羊之牛是告充鼎及鼎是舉冪告絜也禮之次者謂特牲之禮為此次故準之以說天子之禮也鼎圜奔上謂之鼎釋器文孫炎曰鼎斂上而小口者以傳直言小鼎不說其形故取爾雅文以足之傳正義曰吳諱考成者人自娛樂必謹諱為聲故以娛為諱也定本娛作吳考成釋詁文箋正義曰柔安釋詁文少牢特牲大夫士之祭也其禮小於天子尚無兕觥故知天子正祭無兕觥矣今此繹之禮至旅醑而用兕觥變於正祭也知至旅而用之者兕觥所以罰失禮未旅之前無所可罰至旅而可用

獻醕交錯或容失禮宜於此時設之也有司徹是大夫賓尸之禮猶天子之繹所以無兕觥解者以大夫禮小即以祭日行事未宜有失故無也上經說祭初行禮唯謂士耳此言飲美皆思自安則是諸助祭者非獨士也以祭末多倦怠傲慢故美其於祭之未能不謹譁不傲慢則於祭前齊敬明矣恭敬明神必將獲福故以此得壽考之休徵壽考未然之事故言徵也

絲衣一章九句

序酌告成大武也言能酌先祖之道以養天下也箋

周公居攝六年制禮作樂歸政成王乃後祭於廟而

奏之其始成告之而已音義

酌音灼字亦作灼疏正  
大如字徐音泰

曰酌詩者告成大武之樂歌也謂周公攝政六年象武王之事作大武之樂既成而告於廟作者觀其樂成而思其武功述之而作此歌焉此經無酌字序又說名酌之意言武王能酌取先祖之道以養天下之民故名篇為酌毛以為述武王取紂之事即是武樂所象衆鄭以為武王克殷用文王之道故經述文王之事以昭成王所由功成而作此樂所以正本之言告成大武不言所告之廟有瞽始作樂而合乎太祖此亦當告太祖也大司樂舞大武以享先祖然則諸廟之中皆用此樂或亦徧告羣廟也言酌先祖之道者周之先祖后稷以來先世多有美道武王酌取用之除殘去暴育養天下故詩人為篇立名謂之為酌序其名篇之意於經無所當也鄭以經陳文王之道武王得而用之亦是酌取之義但所酌之事不止此耳經有遵養時晦毛謂武王取紂鄭為文王養紂此言以養天下則是愛養萬民非養紂身雖養字為

同非經養也酌左傳作約古今字耳箋正義曰周公攝政六年制禮作樂明堂位文雖六年已作歸政成王乃後祭於廟而奏之初成之時未奏用也其始成告之而已故此篇歌其告成之事言此者以明告之早晚謂在居攝六年告之也知然者以洛誥為攝政七年之事而經稱周公成成王云肇稱殷禮祀於新邑時待成王即政乃行周禮禮既如此樂亦宜然故知大武之樂歸政成王始祭廟奏周公初成之日告已之而已

於鏐王師遵養時晦時純熙矣是用大介傳鏐美遵率養取晦昧也箋云純大熙興介助也於美乎文王之用師率殷之叛國以事紂養是闇昧之君以老其惡是周



道大興而天下歸往矣故有致死之士助之我龍受之

蹻蹻王之造載用有嗣傳龍和也蹻蹻武貌造為也箋

云龍寵也來助我者我寵而受用之蹻蹻之士皆爭來

造王王則用之有嗣傳相致實維爾公允師傳公事也

箋云允信也王之事所以舉兵克勝者實維女之事信

得用師之道音義

於音鳥注同鑠舒灼反蹻居表反造毛才老反鄭七報反詣也傳直專反

疏

正義曰毛以為因告大武之成故歌武王之事於乎美哉武王之用師也率此師以取是闇昧之君謂誅

紂以定天下由既誅紂故於是令周道大明盛矣是大明之故遂有大而又大謂致令時之太平也又本用師

取昧之事所以為可美者以我周公用天人之和而受之言以和受殷非苟用強力也蹻蹻然有威武之貌者我武王之所為則用此武而有嗣文王之功王能如是故歎美之實維爾王之事信得用師之道以此故作為大武以象其事鄭以為大武象武王伐紂本由文王之功故因告成大武追美文王之事於乎美哉文王之用師眾也乃率殷之叛國養是暗昧之君以成其惡故民服文王能以多事寡以是周道乃大興矣由有至美之德誠義足以感人是以大賢士來而助之賢士既來我文王寵而受之來者既受用故蹻蹻然有威武之士競於我王之造言其皆來造王王則寵而用之以此而有嗣續言其傳相致達續來不絕由是武王因之得成功作樂故歎美之實維以武王之事信得用師之道言武王以文王之故故得道也傳正義曰鏘美釋詁文又云遵率循也俱訓為循是遵得為率武王於紂養而取之故以養為取宣十二年左傳引此云遵養時晦耆昧也

故轉晦為昧言取是暗昧則謂武王取紂不得與鄭同也又緝熙之訓皆為光明介字毛皆為大則此亦宜然王肅云於乎美哉武王之用衆也率以取是昧謂誅紂定天下以除昧也於是道大明是用有大大言太平也箋正義曰純大熙興皆釋詁文以卒句乃言信得用師之道於此未宜歎其大大故依常訓以介為助以武王之業因於文王養紂不伐是文王之師養者承事之辭故文宜本之於父故以為美文王之師養者承事之辭故云率殷之叛國以事紂左傳云耆昧也皇矣云上帝耆之是養之至老故云養是暗昧之君以老其惡論語云三分天下有其二以服事殷周之德可謂之至德孔子歎美文王謂之至德是周道以養紂之故遂得大興也孟子說伯夷避紂居北海之濱太公避紂居東海之濱間文王作興而歸之二老者天下之大老也而歸之是天下父歸之也天下父歸之其子焉往也是天下歸往之也文武之士並歸周但下言躊躇是威武之貌故云

有致死之士衆來助之文王率殷之叛國以事紂襄四年左傳文傳正義曰龍和也者龍之為和其訓未聞魯頌稱躋躋虎臣故為武貌造為釋言文王肅云我周家以天人之和而受殷用武德嗣文之功傳意或然天人之和謂天助人從和同與周也箋正義曰龍寵也者上言大介為大來助周則我龍受之龍此大介寵之以龍為聲故龍為寵也來即寵受人皆羨之故躋躋之士爭來造王而王又用之則其餘嗣續而至儒行說交友之道久相待遠相致故以有嗣為傳相致也從大介至有嗣即之為三等言從周之士有先後而至也傳正義曰公士釋詁文箋正義曰允信釋詁文王說行文王之士至此乃述武王故言武王之士所以舉兵克勝謂伐紂也勝之也

酌一章九句

序桓講武類禡也桓武志也箋云類也禡也皆師祭

也音義

禡馬嫁反桓武志也本或以此句為注

疏

正義曰桓詩者講武類禡之樂歌也謂武

王將欲伐殷陳列六軍講習武事又為類祭於上帝為禡祭於所征之地治兵祭神然後克紂至周公成王太平之時詩人追述其事而為此歌焉序又說名篇之意桓者威武之志言講武之時軍師皆武故取桓字名篇也此經雖有桓字止言王身之武名篇曰桓則謂軍衆盡武諡法關土服遠曰桓是有威武之義桓字雖出於經而與經小異故特解之經之所陳武王伐紂之後民安年豐克定王業代殷為王皆由講武類禡得使之然作者主美武王意在本由類禡故序達其意言其作之所由講武是軍衆初出在國治兵也類則於內祭天禡則在於所征之地自內而出為事之次也箋正義曰釋天云是類是禡師祭也

王制云天子將出征類乎上帝禡於所征之地注云上帝謂五德之帝所祭於南郊者言祭於南郊則是感生之帝夏正於南郊祭者周則蒼帝靈威仰也南郊所祭一帝而已而云五德之帝者以記文不指言周不得斥言蒼帝故漫言五德之帝以總之又嫌普祭五帝故言南郊以別之五德者五行之德此五行之帝各有本德故稱五德之帝太昊炎帝之等感五行之德生亦得謂之五德之帝但類於上帝謂祭上天非祭人帝也且人帝無時在南郊祭者以此知非人帝也謂之類者尚書歐陽說以事類祭之天位在南方就南郊祭之春官肆師云類造上帝注云造猶即也為兆以類禮即祭上帝也類禮依郊祀而為之者言依郊祀為之是用歐陽事類之說為義也言為兆以祭上帝則是隨兵所向就而祭之不必祭於南郊但所祭者是南郊所祭之天耳正以言造故知就其所住為其兆位而祭之不要在南郊此言小異於

歐陽也南郊之祭天周以稷配此師祭所配亦宜用  
常配之人周即當以后稷也禡之所祭其神不明肆  
師云凡四時之大田獵祭表貉則為位注云貉師祭  
也於立表處為師祭祭造軍法者禱氣勢之增倍也  
其神蓋蚩尤或曰黃帝又甸祝掌四時之田表貉之  
祝號杜子春云貉兵祭也田以講武治兵故有兵祭  
習兵之禮故貉祭禱氣象之千百而多獲由此二注  
言之則禡祭造兵為軍法者為表以祭之禡周禮作  
貉貉又或為貊字古今之異也  
貉之言百祭祀此神求獲百倍

綏萬邦屢豐年箋云綏安也屢亟也誅無道安天下則  
亟有豐熟之年陰陽和也天命匪解桓桓武王保有厥  
士于以四方克定厥家傳士事也箋云天命為善不解

倦者以為天子我桓桓有威武之武王則能安有天下之事此言其當天意也於是用武事於四方能定其家先王之業遂有天下於昭于天皇以間之傳間代也箋

云于曰也皇君也於明乎曰天也紂為天下之君但由

為惡天以武王代之音義

屢力住反亟欺冀反數也下同解音懈注同於音烏注同

間間廁之

疏

正義曰毛以為武王誅紂之後安此萬邦使無兵寇之害數有豐年無饑饉之憂所

以得然者上天所任命為善不解倦者以為天子桓桓然有威武之武王則能安有其天下之事是其為善不  
倦故為天所命於是用其武事於四方除其四方之殘賊能安定其家謂成就先王之業遂為天下之主乃歎



而美之於乎此武王之德乃明見於天殷紂以暴虐之  
故武王得用此美道以代之鄭唯下二句為異言於明  
乎曰天言天道之大明也紂為天下之君但由為惡之  
故天以武王伐之餘同箋正義曰綏安釋詁文又云亟  
屢疾也同訓為疾是屢得為亟也經言萬國箋言天下  
天下即萬國也堯典云協和萬邦哀七年左傳曰禹會  
諸侯於塗山即玉帛者萬國則唐虞夏禹之時乃有此  
萬國耳王制之注以殷之與周唯千七百七十三國無  
萬國矣此言萬國者因下有萬國遂舉其大數此文廣  
言天下之大不斥諸侯之身國數自可隨時變易其地  
猶是萬國之境故得舉萬言之此安天下有豐年謂伐  
紂即然僖十九年左傳云昔周饑克殷而年豐是伐紂  
之後即有豐年也天命為善不解倦者以天命匪解為  
下文總之克定厥家是天下之事故知天命以為天子  
也安有天下之事謂天下眾事武王能安而有之以天  
下為任而行之不解言其當於天意也以當天意故天

命之於是用其武事於四方謂既能誅紂又四方盡定由是萬國得安陰陽得和此言結上之意也家者承世之辭故云能定其家先王之業遂有天下先王雖有其業而家道未定故於伐紂其家始定也傳正義曰間代釋詁文毛傳未有以于為曰皇多為美此義必不與鄭同也王肅云於乎周道乃昭見於天故用美道代殷定天下傳意或然箋正義曰于曰皇君釋詁文言於明乎曰天言天去惡與善其道至光明也以武王代紂即是明之事言武王當天意以代紂所以歎美之

桓一章九句

序賚大封於廟也賚予也言所以錫予善人也箋云

大封武王伐紂時封諸臣有功者音義賚來代反與也徐又音來

疏正義曰賚詩者大封於廟之樂歌也謂武王既伐紂於廟中大封有功之臣以為諸侯周公成王太平之時詩人追述其事而為此歌焉經無賚字序又說其名篇之意賚予也言所以錫予善德之故名篇曰賚經之所陳皆是武王陳文王之德以戒勅受封之人是其大封之事也此言大封於廟謂文王廟也樂記說武王克殷之事云將帥之士使為諸侯下文則云虎賁之士脫劔祀乎明堂注云文王之廟為明堂制是大封諸侯在文王之廟也箋正義曰以言大封則所封者廣唯初定天下可有此事守文之世不應得然且宣十二年左傳曰昔武王克商而作頌其三曰敷時繹思我徂維求定引此文以為武王之頌故知武王伐紂時封諸臣有功者封為諸侯樂記武王克殷未及下車而封薊祝陳下車而封杞宋又言將率之士使為諸侯是大封也昭二十八年左傳曰昔武王克商光有天下其兄弟之國者十有五人

姬姓之國者四十人古文尚書武成篇說武王克殷而反祀於宗廟列爵惟五分土惟三大賚於四海而萬姓悅服皆是武王大封之事此言大封於廟樂記未至廟而已封三恪二代者言其急於先代之意耳祭統曰古者明君必賜爵祿於太廟示不敢專也然則武王未及下車雖有命封之必至廟受策乃成封耳亦在此大封之中也皇甫謐云武王伐紂之年夏四月乙卯祀於周廟將率之士皆封諸侯國四百人兄弟之國十五人同姓之國四十人如謐之言此大封是伐紂之年事也

文王既勤止我應受之敷時繹思我祖維求定傳勤勞應當繹陳也箋云敷猶徧也文王既勞心於政事以有天下之業我當而受之敷是文王之勞心能陳繹而行

之今我往以此求定謂安天下也時周之命於繹思箋

云勞心者是周之所以受天命而王之所由也於女諸

臣受封者陳繹而思行之以文王之功業勅勸之音義

敷音孚繹音亦徧音遍下篇同於鄭如疏正義曰武王

字王音烏王于況反又如字下篇同既封諸臣有

功者於文王之廟因以文王之道戒勅之言我父文王

既以勤勞於政事止以勤勞於事故有此天下之業我

當受而有之故我徧於是文王勞心之事皆陳而思行

之我往以此維求安定言用文王之道往行天下以求

天下之定此文王勞心之事是我周之受天命而王之

所由於乎今汝諸臣受封者亦當陳而思行之言已陳

行文王之道勅諸臣亦使陳而行之以此而至於太平

故追述而歌之也傳正義曰勤勞應當繹陳皆釋詁文

箋正義曰敷訓為布是廣及之義故云猶徧也文王既勞心於政事者尚書所謂日昃不遑暇食是其事也由此勞心以有天下之業我當受之謂受其位為天子也今我往以此求定者往者自己及物之辭謂行之於天下以求安定天下也是周之所以受天命者言是者上之勞心也上天之命命不解怠者故知勞心是周之所受天命而王之所由此詩為大封而作故知於繹思是勅諸臣受封使陳而思行之文王之道可永為大法故以文王之功業勸之於亦歎辭也

### 賚一章六句

序般巡守而祀四嶽河海也箋云般樂也音義

般薄寒反

注同守手又反般樂也音洛  
崔集注本用此注為序文

疏

正義曰般詩者巡守而祀四嶽河海之樂

歌也謂武王既定天下巡行諸侯所守之土祭祀四岳河海之神神皆饗其祭祀降之福助至周公成王太平之時詩人述其事而作此歌焉經言喬嶽翕河是祀河岳之事也經無般字序又說其名篇之意般樂也為天下所美樂定本般樂二字為鄭注未知孰是岳實有五而稱四者天子巡守遠適四方至於其方之岳有此祭禮於中岳無事故序不言焉四瀆者五岳之四故周禮岳瀆連文序既不言五岳故亦不言四瀆以河是四瀆之一故舉以為言漢書溝洫志曰中國川原以百數莫著於四瀆而河為宗然則河為四瀆之長巡守四瀆皆祭言河可以兼之經無海而序言海者海是衆川所歸經雖不說祭之可知故序特言之

於皇時周陟其高山隴山喬嶽允猶翕河傳高山四嶽

也墮山山之墮墮小者也翕合也箋云皇君喬高猶圖也於乎美哉君是周邦而巡守其所至則登其高山而祭之望秩於山川小山及高嶽皆信案山川之圖而次序祭之河言合者河自大陸之北數為九祭者合為一敷天之下裒時之對時周之命傳裒聚也箋云裒衆對配也徧天之下衆山川之神皆如是配而祭之是周之所以受天命而王也音義於音烏注同墮吐果反注同郭云山狹而長也又同果反字又作墮喬嶽上音橋下音岳翕許及反裒蒲侯反於繹思毛詩無此句齊魯韓詩有之今毛詩有者衍文也



崔集注本有是採三家疏正義曰毛以為於乎美哉是之本崔因有故解之周家也既定天下巡省四方

所至之處則登其高山之岳而祭之其祭之也於大山之傍有墮墮然之小山與高而為岳者皆信案山川之圖者又合九河為一以大小次序而祭之也徧天之下山川皆聚其神於是配而祭之能為百神之主德合山川之靈是周之所以受天命由此也鄭唯以皇為君哀為衆為異餘同傳正義曰岳必山之高者故知高山四岳也墮山對高山為小故知山之小者墮墮然言其狹長之意也毛於皇字多訓為美王肅云美矣是周道已成天下無違四面巡岳升祭其高山傳意或然翕合釋詁文箋正義曰皇君喬高釋詁文猶圖釋言文以於已足歎美之辭故以皇為君君是周邦謂為天子也巡守所至則登其高山而祭之謂每至其方告祭其方之岳也堯典及王制說巡守之禮皆言望秩于山川堯典注云徧以尊卑次秩祭之則知墮山喬嶽允猶翕河皆謂

秩祭之事故云小山高岳皆信案山川之圖而次序祭之此即望秩之事也喬岳與上句高山俱是一事但巡守之禮其祭主於方岳故先言陟其高山又說望秩之意言小山亦可與四岳同祭故又言喬岳令與小山為類見其同祭之耳允猶之文承山岳之下可案山圖耳而并云川者山之與川共為一圖言望秩山川則亦案圖耳但河分為九合而祭之一故退翕河之文在允猶之下使之不蒙允猶自河以外其餘衆川明皆案圖祭之故云信案山川之圖信者謂審信而案之又解山不言合獨河言合者河自大陸之北數為九河祭者合之為一故云翕也禹貢導河自積石至于龍門南至華陰東至于底柱又東至于孟津東過洛汭至于大伾北過泇水至于大陸又北播為九河同為逆河入於海是大陸之北數為九河數者分散之言與播義同故彼注云播猶散也同合也下尾合為逆同言相迎受也然則因大陸分而為九至下又合為一以其首尾是一故祭

者合之漢書地理志鉅鹿郡有鉅鹿縣大陸澤在其北  
禹貢注云在鉅鹿鄭志答張逸云鉅鹿今名廣河澤然  
則河從廣河之北分爲九也禹貢兗州九河既道孔安  
國注云河水分爲九道在此州界平原以北是也鄭注  
云河水自上至此流盛而地平無岸故能分爲九以衰  
其勢壅塞故通利之也九河之名徒駭太史馬頰覆釜  
胡蘇簡絜鉤盤鬲津周時齊桓公塞之同爲一今河間  
弓高以東至平原鬲津往往有其遺處馬鄭言九河之  
名釋水文也李巡曰徒駭者禹疏九河以徒衆起故曰  
徒駭太史者禹大使徒衆通水道故曰太史馬頰者河  
勢上廣下狹狀如馬頰覆釜者水多渚其渚往往而處  
狀如覆釜胡蘇者其水下流故曰胡蘇胡下也蘇流也  
簡者水流而簡大也絜者言河水多山石之苦故絜絜  
苦也鉤盤者河水曲如鉤屈折如盤故曰鉤盤鬲津者  
河水狹小可隔爲津故曰鬲津孫炎曰徒駭者禹疏九  
河功難衆懼不成故曰徒駭太史者大使徒衆故依名

云胡蘇者水流多散胡蘇然簡者水通易也鉤盤者水曲如鉤盤桓不前也鬲津者水多阨狹可隔以為津而橫渡也是解九河之名義也溝洫志稱成帝時博士許商以為古記九河之名有徒駭胡蘇鬲津今見在成平東光鬲界中自鬲以北至徒駭間相去二百餘里今河雖數移不離此域如商此言上舉三河之名下以縣充之則徒駭在成平胡蘇在東光鬲津在鬲縣其餘六者商所不言蓋於時以不能詳知其處故也又商言自鬲以北至徒駭間相去二百餘里則徒駭是九河之最北者鬲津是九河之最南者然則爾雅之文從北而說也太史馬頰鉤盤文在胡蘇之上則三者在成平之南東光之北也簡絜覆釜文在胡蘇之下則三者在東光之南鬲縣之北也鄭亦不能具知所在故云往往有其遺處是其不審之辭也郭璞云徒駭今在成平縣東光有胡蘇亭鬲盤今皆為縣屬平原渤海東光成平河間弓高以東往往有其遺處馬璞言盤今為縣以為盤縣具

餘亦不審也。雖古之河跡難得而詳，要於禹貢之時，皆在兗州之界。於漢之世，則兗州之所部近南，其界不及於北。故鄭志趙商謂河在兗州之北，已分為九河，分而復合於大陸之北，又分為九故，問之曰：禹貢導河至于大陸，又北播為九河，然則大陸以南固未播也。在於兗州，安得有九？至於何時復得合為一，然後從大陸以北復播為九也？答曰：兗州以濟河為界，河流分兗州界文自明矣。復合為一，乃在下頭子走南北，何所求乎？觀子所云，似徒見今兗州之界不及九河，而青冀州分之，故疑之耳。既知今亦當知古是鄭以古之九河皆在兗州之界，於漢乃冀州域耳。言復合為一，乃在下頭正以經云：同為逆河，入于海。明并為一河，乃入于海。故云在下頭耳。亦不知所并之處，故不斥言之。齊桓公塞為一者，不知所出何書，其并為一未知并從何也。傳正義曰：哀聚釋詁文箋正義曰：釋詁云：哀衆多也。俱訓為多是哀得為衆釋詁云：妃合會對是對得為配言徧天之下則

無有不祭故以為衆山川之神皆配祭之王言配者山川大小相從配之祭無不徧之意也是周之所以受天命而王者言其得神之助故能受天之命武王受命伐紂後乃巡守方始祭祀山川而云受命由此者作者以神能助人歸功於神見受命之前已能敬神及今巡守猶能敬之故所以得受天命而王天下言此是神明之助故也此篇末俗本有於繹思三字誤也

般一章七句

閔予小子之什十一篇十一章百三十七句

毛詩注疏卷二十八

毛詩注疏卷二十八考證

閔予小子章陟降在庭○庭漢書作廷

良耜章其鏹斯趙○趙周禮注集韻俱作摑

絲衣章○說文作素衣

載弁俅俅○說文作弁服俅俅

自羊祖牛○韓詩外傳作自羊來牛

賚章敷時繹思○敷左傳作鋪

般章允猶翕河箋河自大陸之北數為九○  
臣光型按


苑洛語錄云九河故道今永平府撫寧縣碣石山與諸家所載碣石之狀合則九河在滄平間海之灣山東通志馬頰在商河覆鬴在海豐鈎盤在德平鬲津在樂陵徒駭在齊河皆濟南府所屬今真定去濟南東西六百餘里古河自泲水直趨而北至大陸皆真定地又北播為九河固永平河間地也不應河至大陸北而東反迴流而南以至濟南之境考明一統志亦謂在濟南不足據從韓說為近



箋疏齊桓公塞為一者不知所出何書（）臣光型按

春秋保乾圖云移河為界在齊呂填關八流以自廣

當是本此



毛詩注疏卷二十八考證